

Vom Osterhas unn onnern Märcher

Als die letzt Woch so e schee Wetter war, hadde merr Besuch vom Schorsch unn vom Kättche unn hawwe ess ersdemol ferr diesjohr uff de Terrass gesetze. De Himmel war blau, die Luft war warm, unn ess Gras unn die Knospe vom Ebbelboom unn die Blätter vom Flieder konnsde richdisch wachse heern.

War de Has schunn bei eich?, hotts Kättche gelacht, weil die Stiefmüttcher, die Tulwe, die Osterglocke unn die Primelcher butze eiern Gadde wie mett bunte Ostereier.

Ja, hott moi Fraa gesacht, werklich wie Ostereier. Ess iss doch e gonz onner Sach, wens Friehling werrd unn wens iwverall blüht – merr iss enn gonz neie Mensch. Awwer jetz mach ich erstemol Kaffee.

De Schorsch hott soi Gesicht in die Sunn gehalle: Unn wens owends länger hell iss unn wens schee warm iss, doo waaß merr erst, was merr de Winter iwver vermisst hott.

Unn die Veechelscher sinn gonz wild, habb ich gesacht, die Meisjer mache im Ebbelboom erum, die Omsele streite sich um die Nistplätz, vorhin hawwe zwaa Grünfinke nooch uns geguckt, die Dauwe rucksern – ach ihr Leit, doo hawwe merr schunn long druff gewart. Jetz fehle nor noch die Schwalwe om Himmel.

Druff de Schorsch: So konns bleiwe unn langsam besser werrn. Gestern sinn merr im Feld spaziern gonge, doo habb ich Feldhinkel rufe geheert unn vier, fünf Hase geseh, koo Karnickel, richdische Osterhase warns unn die sinn erumgerennt wie verrickt

Moi Fraa kam mett de Kaffeetasse unn de Dellerscher: Jetz will halt alles Eier leeche und Noochwuchs hawwe, ess iss Oofong April, die könnes nit mehr abwarte.

De Schorsch hott genickt: Awwer nochemol zu dene Hase. Die Frucht iss joo noch nit hoch unn grad jetzt vor Ostern konnsde se gut seh, wie die Männcher dene Weibcher noochmache unn sich debei iwverschlaache vor Dollheit. Ich kann merr vorstelle, doo hott emol ooner zwonsisch Eier – so vill leeche die! – vom Feldhinkel gefunne unn die Hase erumrenne seh unn hott aus de Hinkelseier unn de Feldhase ess Märche vom Osterhas gemacht.

Konn soi, habb ich gemoont, awwer ess gibt joo aach noch onnern Märcher. Im Blättche habb ich e Bild geseh, doo hott enn Storch in de Näh vom Kronkehaus, mitte in Flerschem, uffem Dach gestonne. Der werd bald kloone Kinner bringe.

Iss doch komisch, hott de Schorsch gesacht, wennde unser Enkel frooche dust, dann glaawe die eher dess Märche vom Osterhas als dess vom Storch, moonsde nit aach?

Doo mischt sich soi Fraa, dess Kättche, oi: Ich glaab dess kimmt doodefoo, weil im Fernseh sehn die Kinner jeden Daach, wies gemacht werd dasses kloone Kinner gibt, dess iss ferr die koo Märche mehr. Mettem Osterhas isses onnerst, von dem heern se nor oomol im Johr, unn villeicht deshalb iss der ferr die Kinner immer noch e Märche.

Ich habb e bisje driwwer noochgedenkt: Doo konnsde Recht hawwe, Kättche, awwer nit nor die Kinner, aach mir Ältere heern doch ab unn zu gern Märcher, odder?

Doo grinst dess Kättche: Doo hosde recht, Honnes. Was glaabsde was monche Männer – unn nit nor im Friehling – ihrne Fraue ferr Märcher erzähle. Die glaawese joo nit, awwer monchmol sinn dene die Märcher liewer als die Tatsache. Gell, Schorsch?

Eiern Honnes